

DEO OPTIMO MAX.

UNI ET TRINO,

VIRGINI DEIPARÆ, ET S. LUCÆ
Orthodoxorum Medicorum Patrono.

QUÆSTIO MEDICA,

QUOD LIBETARIIS DISPUTATIONIBUS
*manè discutienda, in Scholis Medicorum, die Jovis vigesima-
secundâ Januarii anni M. DCC. XXXIII.*

M. OTTONE-CASIMIRO BARFEKNECHT,
Doctore Medico, Præside.

An omne vivens ex ovo?

I.

OMNIA ex ovo fieri credidit antiquitas, non heroicis modò temporibus, sed & Philosophicis, etiam ante Aristotelem qui arboribus ova tribuit ex Empedocle, & insectis ovi speciem, & quadrupedibus fœturam ovi testâ exuti similem, ab Hippocrate edoctus, qui & in muliere abortiente ovum agnovit. Ovum est id omne ex cujus parte fœtura fit, ex alterâ alitur. Quæ definitio omnium viventium initiis convenit. Ovorum exemplar vulgatissimum, id quod est avium. Nec minus habentur ova, quæ sunt piscium & insectorum. Seminibus arborum omnibus inest plantula, multis pulpa; quâ nutriatur; omnibus folia primigenia, radiculis & cauliculo germinanti succum, quo turgent, refundentia: hæc autem omnia vel testis inclusa vel secundis, quid aliud sunt quam ovum? cum præsertim arbores ex Aristotele utriusque sexûs symbolas habeant, vim scilicet masculam, fœmininamque materiam. Ova quis denegat piscibus squammosis, c. rtilagineis, testâ, putamine, corio molli, duro, testis; nisi forte cetaceos excludat? nec minùs sua sunt cetaceis ova quàm cæteris piscibus, cum eorum eadem sit conditio, quæ quadrupedum viviparorum, quibus nec ipse negavit Aristoteles.

II.

QUIS igitur neget de Hômine? cujus primordia partesque, è quibus contextitur, iisdem planè quàm cæterorum animantium legibus tenentur: nec mirum, corpus hominis qui animâ rationis particeps, reliquis animantibus tantummodò antecellit, iisdem ex elementis cum cæteris animantibus, similibusque partibus integrantibus compositum, iisdem quoque mutationibus, iisdemque impulsionibus sive ab alimentis sive ab elementis oppositum sit, necesse est. Partes hæc in omni animantium genere solidæ sunt & fluidæ; utrarumque tum in homine, tum in brutis par nexus, consensus idem, & organa ad nutritionem & generationem

2

ſpectantia uſus ratione ſimilia. Nec enim corpore perfectior eſt cæteris aut imperfectior : nil à ſummo artifice imperfectè aut conditum imperfectum ; nullum ullo perfectius ad uſus proprios. Animalcula quæque minima in ſuo genere, ſuæque ſpecie perfecta ſunt, & ſi ſpectanda parvitas, videntur potiùs perfectiora, magis admiranda, digitoque divini artificis digniora, quò minor. Communis animantium omnium exitus, mors, eorumque diſſolutio ſivè interitus ab iſdem planè cauſis pendens, prorsùs eſt eadem ; atque ut partes ſimilibus initiis efformantur, ſic & in eadem reſolvuntur elementa.

I I I.

COMPOSITIONIS principia non ſunt ſemen maſculinum & ſanguis menſtruus, (hic quidem in mulieribus ſingulis circiter menſibus, quandiu ſanæ ſunt, & utero valent concipere, è ſinu muliebri prodit : ſed ad generationem & conceptionem per ſe inutilis & velut excrementum foràs ablegandus) nec utriuſque parentis genitura in utero, ut in campo fertili atque ſæcundo commixta. Nihil in utero cujuſcumque tandem generis ſœmellarum primis à conceptione diebus reperitur : nec in eo licèt certò conceperint, ulla ſœcundationis ſigna ſeſe offerunt. Semen quidem maſculinum, poſſiſſimum in homine & quadrupedibus plerùmque uſque in uteri cavitatem penetrat ; non tamen ut illic ſemini muliebri commiſceatur ; nullum enim intùs ſemen ejaculantur ſœmellæ, niſi è teſticularibus in uterum tempore congreſſus emittitur. In his vaſa ſemen deferentia & ejaculantia, virilibus reſpondentia fruſtra quaſieris. Nec parùm differunt maſculini teſticulari à ſœmininis : in illis enim glanduloſa & vaſculoſa ſunt organa, quorum tubuli ſpeciali diametro donati, copioſum ſincerumque ſemen ab alluente jugiter per arterias ſanguine ſecernunt ; ſœminini teſticulari nequaquam glanduloſi aut vaſculoſi è membranarum & villis contexti, ſed multis veſiculis circumſcriptis & orbicularibus, & liquore turgidis toti conſtant. Liquor qui undique in vulvam tempore congreſſus depluit, ſemen non eſt, in uterum non penetrat, nec à teſticulari prodit : at liquori qui è marium proſtatis dimanat ſimilis, & eidem in ſœmellis uſui comparatus, è lacunis & glandulis conglomeratis vulvam undique & urethram ambientibus, in vulvam erumpit. Incaſum igitur prima conceptionis ſigna, primaque futuri foetus rudimenta in mulierum aut ſœmellarum utero, vel alibi quam in earum teſticularibus quaſieris. Paucis à conceptione diebus, una aut plures è teſtium bullulis ampliuntur & erubeſcunt, tandemque grandiores factæ, teſticulari tunicam in eà parte, quæ cujuſque bullulæ centro reſpondet, perforatam penetrant & velut fructus ab arbore maturi, decidunt. Hæ bullulæ non ſunt hydarides aut corpora inibi præter naturam genita ; in omnium paſſim ſœmellarum quiniò & mulierum teſticularibus reperiuntur : & quoniam eaſdem planè mutationes ſubeunt, quas veſiculæ in volatilibus (quæ omnium conſenſu ex ovo producuntur & ea-propter ovipara dicuntur) racemo obſervatæ, & reliqua in his & illis organa generationis analogæ ſunt & ſimilia, hæ veſiculæ non immeritò in utroque genere, oviparo ſcilicet & viviparo, ejuſdem planè indolis, ejuſdemque naturæ aſſeruntur

I V.

ORGANA generationi dicata in maribus paſſim omnibus bina ſunt corpora rotunda foris pendula aut ipſo abdomine aut abdominis tegumentis concluſa, paululum plana, ex vaſculis tenuiſſimis ſeminalibus dictis & inteſtinalium more contortis conſtata, à ſanguine ſemen per vaſa deferentia, proxime, aut in quibuſdam animalibus & in homine mediis veſiculis aſſervatum in urethram & inde in uterum coitis tempore ejaculandum ſecernentia. Licet generationis organa ſœmellarum ovipararum & vivipararum, non ſecùs ac marium

propterea analogia sint, reperiunturque in utroque genere vagina, uterus, uteri tubæ, & vesiculæ orbiculares liquore turgidæ, nonnihil tamen inter hasce partes intercedit discriminis. Vesiculæ quippè in gallinâ & cæteris volatilibus, non continentur in binis corporibus, quæ eorum testiculi vocentur, nec binæ sunt ut in homine & quadrupedibus tubæ; quamvis nihilominus uterus in muliere non sectus ac volatilibus, simplex sit & indivisus; at unâ eâdemque membranâ in regione lumbari sitâ conclusæ & conglomeratæ, omnique vasorum genere laxè intertextæ veluti racemum constituunt, quem nonnulli superiorem avium uterum, rectius autem alii ovarium nominarunt. Licet hunc racemum ab ovo, ovarium nuncuparent; quæ tamen in eo continentur vesiculæ sine albumine & testâ deprehenduntur, nec idcirco eis ovi nomen denegandum. Harum enim quæ galli semine fecundatæ sunt, jam in sese continent omnia, à quibus accedente incubatione, aut alio blando calore, foetus numeris omnibus absolutus fingatur & efformetur. Quinimò tantùm abest, ut eis ovi nomen non concedamus, quin potius & ovi cicatriculæ sive oculo tribuamus, eamque omnem ovi indolem & naturam in sese completi asseramus. Ovum quidem à gallinâ enixum constat cicatriculâ, vitello, chalazis, albumine, tunicis cuique liquori propriis, testâ, & aëre; verùm hæc præter unam cicatriculam de ovi naturâ non sunt; in eorum tantummodò animantium ovis reperiuntur, quæ intrâ se, ea non fovent, & in quibus necesse est, non modò quæ ad foetus formationem requiruntur contineri, sed & omnia quæ ad ejus nutritionem donec testâ excludatur. Vitellus igitur & albumen uni foetus nutritioni, nullatenus autem ejus formationi dicantur. Aër vicem elateris quo automatum motus perpetuantur, vicemque materni cordis sanguinem aut potius chylum in homine & quadrupedibus in placenta radices impellentis gerens, sensim vitellum & albumen comprimit & adigit in radices pulli umbilicales. Mutationes autem, quæ pulli formationem præcedunt aut concomitantur in unâ cicatriculâ observantur: Hæc enim cùm à gallinæ incubantis fori ad pullulationem properat, dilatatur illico & explicatur, in ipsâque tertio circiter incubationis die punctum sanguineum micans & saliens, principium cordis, deprehenditur, sequentibusque diebus ex colloquamento in quo antea nulla aut exigua foetus vestigia, pedetentim omnes pulli partes effinguntur. Vesiculæ igitur, quæ in volatilium racemo conspiciuntur, ratione cicatriculæ quam in superficie suâ inclusam continent, genuina sunt ova. Etsi verò volatilia potissimumque gallina, quandoque sine mare ova pariant, subventanea & infœcunda, attamen in plerisque volatilibus vesiculæ in ovario conclusæ illis inertes & otiosæ degunt, donec semine masculino aspersæ, excusso veluti veteris, & ut à blandiende sole mandata terræ semina intumescunt, & ab ovario superfluo calyculo per oviductum in uterum albumine, & postmodum in reliquo transitu testâ contegendæ, labuntur.

V.

CUM igitur liquidò constet cicatriculam, omnem ovi indolem in sese complecti, & omnes pari mutationes quæ ad pulli formationem spectant, quidni vesiculæ, quæ in muliere, & fœcellarum quadrupedum testiculis continentur, mole quantumvis exiguæ, quæ à maris semine non aliter quàm volatilium rubescunt, intumescunt, à testiculis per tubas in uterum decidunt, quidni, inquam, mulierum & quadrupedum habebuntur ova, testiculi earum ovaria, & uteri tubæ oviductus? Nec his vesiculis à testiculis seu ovariis decidentibus, ullatenus obstat tubarum angustia & earum libera in abdomine fluctuatio; hæc utraque multo major est in volatilibus, in quibus ratum inconsumumque manet, vitellos ab ovario decidosos, ab oviductu suscipi & ope fibrarum quibus cingitur motricium, sensim

in uteri cavitatem protrudi. Longè major est proportio ovi muliebris aut quadrupedum ad uteri tubas, quàm in volatilibus vitelli ad oviductum. Oviductus in his ovario nusquam annexus, liberè in abdomine hùc illucque fluctuat. In homine verò & quadrupedibus tubarum expansio per unam aut alteram laciniam testiculo connexa, parùm ab eo recedere ac divagari potest. Oviductus denique in plerisque volatilibus undique indivisus; in homine autem & quadrupedibus turbarum expansio in varias hinc inde lacinias divisa ac quodammodo lacera, longè faciliùs congressus tempore, aut forsitan aliquot à conceptione, id est, ab ovi fecundatione diebus, testiculo applicari potest, eumque amplecti. Hincque fit ut in cadaverum sectionibus quandoque ei præter naturam undique continua & connexa occurrat; abortis scilicet inflammatione vel ulcere, eo tempore quo tuba testiculum seu ovarium amplectitur. Cùm itaque ovum ab ovario decidens, non nisi tubarum interventu in uteri cavitatem penetrare possit, quid mirum si quandoque * in homine conceptus, immò si quandoque fœtus testiculis reperiatur adhærens? ut hîc Parisiis observatum, in quo dentes, crines, & oculorum alter, non modò sinè microscopio videri; sed & manibus contrectari poterant. Quid, inquam, mirandum, si non rarò fœtus numeris omnibus absolutus in abdomine aut uteri tubis reperiatur? ova enim ab ovario decidua in limine turbarum hærentia, atque hîc radices agentia, crescunt in fœtus perfectos, atque proprio pondere excidunt dùm maturuere, & in abdominis cavo consistunt, nunquam ejicienda. Idem evenit mediis in tubis, si eatenus transmissa locorum angustiiis detineantur, nec perveniant ad uterum. Hujusmodi tamen angustię etsi conceptioni præexistant, ovorum in testiculis seu ovariiis à maris geniturâ fecundationi nullatenus obfunt, ut dilucidè ex cuniculorum anatome evincitur; adest enim in earum tubis valvula eas ocludens, & impediens ne quid ab utero ad ovarium penetrare possit. Sunt igitur mulierum & quadrupedum testiculi earum ovaria, & ex eorum vesiculis seu ovis formari fœtum usque adeò liquidum est, ut ex numero calyculorum in testiculis superstitum, certò conjicere liceat, quot fœtus fœmella utero gestaverit, & quibus bipartitus est uterus, quot in uteri parte dextrâ, quot in sinistrâ.

* *Historia Regiæ Scientiarum Academiæ ann. 1690. p. 276.*

Ergò omne vivens ex ovo.

DOMINI DOCTORES DISPUTATURI.

M. Thomas-Renatus Gafnier.

M. Petrus Maloet, Consiliarius & Medicus Regis ordinarius, nec-non Domus Invalidorum Ducum & Militum, Academia Scientiarum Socius.

M. Petrus-Antonius Lepi

M. Philippus Davier de Breuille, Dotariæ Hispaniarum Regina Medicus perpetuo ordinarius.

M. Guillelmus de Magny.

M. Elias Col de Vilars, Chirurgia Professor designatus Regis Consiliarius & in Castello Medicus ordinarius.

M. Jacobus Trant, è Regiâ Scientiarum Academia.

M. Gabriel-Antonius Jacques.

M. Henricus Besnier.

Proponebat Parisiis: JACOBUS-FRANCISCUS VANDERMONDE, Landracenus, Baccalaureus Medicus, A. R. S. H. 1733. à sextâ ad meridiem.

Typis QUILLAV, Universitatis & Facultatis Medicinæ Typographi, 1733.